

欽定重修兩浙鹽法志

欽定重修兩浙鹽法志卷二

圖說

書之有圖自周官土訓掌道地圖以詔王事而司會之職實掌百物財用之在版圖者以聽其會計於是輯志必首列圖以代口講指畫而鹽爲財用所自出則會計之當尤先版圖焉兩浙鹽筴連袤四省襟江跨海壤地綿亘非圖不能一覽周知此志之藉乎圖也團舍紛羅牙錯基置各場經界或昔無而今有或前合而後分非說不能悉其原委

此圖之藉乎說也若夫

文淵閣爲藏書之所

聖天子用以嘉惠藝林光昭盛典至於治事有官廨育
才有書院皆麗於鹺務者並類及之謹繪圖敘說
如左

行鹽地方總圖

仁和場圖

許村場圖

西路場圖

黃灣場圖

鮑郎場圖

海沙場圖

蘆瀝場圖

橫浦場圖

浦東場圖

袁浦場圖

青村場圖

下砂頭場圖

下砂二三場圖

崇明場圖

錢清場圖

三江場圖

東江場圖

曹娥場圖

金山場圖

石堰場圖

鳴鶴場圖

清泉場圖

龍頭場圖

穿長場圖

大嵩場圖

玉泉場圖

長亭場圖

黃巖場圖

杜瀆場圖

長林場圖

雙穗場圖

永嘉場圖

杭州批驗所圖

嘉興批驗所圖

紹興批驗所圖

松江批驗所圖

兩浙鹽院署圖

運司署圖

寧紹分司署圖

嘉松分司署圖


文瀾閣圖

崇文書院圖

紫陽書院圖

行鹽地方總圖






行鹽地方總圖說

鹽筴之制尚矣各省境壤彼此均有定界而行鹽之地則有析此以合彼者因民之利順民之情勢不得不從其便故周禮設職方以辨其邦域復設合方以通其財利也攷秦漢以迄隋代皆祖管子專正其稅唐則亭戶糴商人初未立限制至宋浙江之鹽兼行蘇松常潤歙等處明增江西之廣信江南之廣德

國朝仍而不改有府十七州二東抵大海西抵江西

南抵閩界北抵江南皆因其勢之所宜而爲之制
蓋大江以南諸郡邑毗連浙境不能舍近圖遠就
食淮鹽至廣信一府界鄰閩省而食鹽於浙爲便
故浙省行鹽得兼兩江幅員廣袤經界參錯謹括
爲全圖以綜其大綱焉



仁和場圖說

兩浙鹽場舊隸運司者二曰仁和曰許村按杭州
晉時以錢塘令領司鹽都尉唐設杭州一場宋分
仁和錢塘二場仁和曰湯村錢塘曰楊村元設三
十四場改名仁和明時與許村並設鹽課司

國朝雍正七年改歸寧紹分司管轄場署在仁和縣
臨江鄉東北二十都乾隆三十八年以舊署傾圯
移建清泰門外會保五畝場境舊有石節護水范
公三塘石節錢武肅王鏐築屢修屢圯乾隆四十


八九等年

高宗純皇帝特發帑金自范公塘至海寧一帶改建魚鱗石塘一勞永逸民竈永賴誠萬世保障之鴻規也場外卽錢塘江有鳳皇五雲諸山錯峙江岸西爲西湖瀦武林諸山之水下達運河東合臨平湖以灌仁和錢塘海寧民田而中通郡城內外諸河以達鹽運商民賴之舊額圍扇散漫雍正三年始聚團并圍運鹽赴所入艮山門候掣仁場所轄東界海寧南至蕭山西接富陽北連許村洵爲諸場之

冠矣

許村場圖

西至仁和場界



南

北


老沙

嫩沙

海

東亞路橋界

河圖運





許村場圖說

場隸海寧州宋太平興國四年以舊臨平監置買
納官總上管下管蜀山巖門南路袁花黃灣新興
八場鹽課元大德三年并蜀山巖門上管下管爲
一場是曰許村明洪武時設場於本州時和鄉徐
家壩永樂九年毀於海患移建場署於安國寺東
卽今州治之北寺巷也安國寺一名鎮國海昌院
蘇軾有雙檜詩大悲閣記又有宋理宗御書妙智
之閣場西北爲巖門山州之主山也距蜀山不遠

宋時皆設鹽場赭山臨海與紹興龕山對峙爲江海門戶其土石皆赤見顧祖禹方輿記要南爲魚鱗石塘竈舍在塘內外運鹽赴掣由陳村港入運河以達省城無別徑也

西路場圖






西路場圖說


西路場宋淳祐四年所置南路場也有南鹽場廳元并袁花黃灣新興南路四場立今名明洪武初設於海寧縣東黃灣寺置東西二倉廨宇一所萬歷三十九年移置新倉去縣治將一舍

國朝乾隆五年分置黃灣場西路境本遼廓自分置後所轄僅一十五里南爲石塘上有廿里亭以形勢言海潮入尖山斜趨西北廿里亭正當其衝自此而西在在衝激全恃石塘爲之捍禦場北有報

功祠祀倡義減竈課諸人明陳與相撰記以述其
事

黃灣場圖





黃灣場圖說

黃灣場由西路場分置在海寧州舊倉地方宋四境圖有黃灣場卽買納官所總八場之一南有塘唐曰捍海宋曰海晏元曰太平明曰障海皆係土塘所謂鹽以石甃以土者也

國朝始建石塘沿海有大尖山小尖山塔山而尖塔兩山之間爲北大鹽卽三鹽之一潮勢北趨必由此鹽而入隄塘屢受其害雍正十三年始築石壩潮水外行全塘鞏固不特蘇湖秀三郡田疇無患


卽各場亦慶安瀾矣尖山臨海最爲險要下有龍

王廟

敕封運德海潮之神又有英濟侯廟在場北亦有功於
捍衛者

鮑郎場圖





鮑郎場圖說

宋澠水志載大觀中舊碑額騎都尉監澠浦鎮稅兼鮑郎鹽場嘉定十四年始分專員據此則鮑郎場大觀前已置場監互兼宋置鹽官多兼職觀常褚題名記大聚落置官司兼二可見嘉定始分專員據嘉定題名記庚辰詔典銓註專官是矣元設鹽司令司丞明置鹽課大使

國朝雍正七年添副使一員乾隆五年裁名鮑郎者昔鹽場初開此有鮑姓鑿浦煮鹽故名場東爲秦

望山西爲譚仙嶺接黃灣場南瀕海竈舍在焉北
至運河水塘宋場解在澈浦城通江橋側有宋時
解址碑記內有秀野堂久廢今署在澈城水關外
鹽倉橋按邑志鮑郎海沙二場舊串灰滷鮑郎爲
甚全恃場司覺察也

海沙場圖

南

海



海沙場圖說

按文獻通考漢鹽官二十八郡會稽海鹽其一也
三國吳亦設海鹽司鹽校尉唐置監嘉興遙領海
鹽是兩浙設官鬻筴斷以海鹽爲始宋立場於沙
腰村明道時罷景祐間復置又分爲海鹽場以海
鹽監兼管元并爲一名海沙場設鹽司令司丞領
之元統元年都御史朱鑑奏移縣東北一十八里
明設鹽課司東爲乍浦城元至正間番舶皆萃於
此明洪武間築城浦上以備禦

國朝設水師雍正七年增設都統駐防實爲海口重鎮稍北爲雅山西界秦駐山與鮑郎場接南至海沿海爲石塘內有備塘正統間築諸團舍皆在焉

荻蘆灘場圖

海王南

關備王正中



城浦乍

西至海鹽縣界

運鹽河

平湖縣

鎮中廣

鎮新

東至橫浦場界



蘆瀝場圖說

蘆瀝場本隸海鹽縣東吳時名南場宋改今名置
榷場於廣陳元祐八年本路提刑盧適移新昌鎮
元名蘆瀝寺明初裁并獨山場洪武元年復置設
鹽課司宣德五年析縣以蘆瀝隸平湖萬歷間場
署移縣治南門

國朝康熙間復置新昌鎮今移全公亭南爲獨山舊
設鹽場於此孤峯嶮峻故以獨名下有白沙泉每
越一夕泉面白沙一層南爲廣陳元趙孟堅隱此

有彝齋運鹽由新開鹽運二河新開河明巡鹽御史董威修復鹽運河明知縣顧廷對濬又名顧公河

國朝知縣林緒光並加重修其名蘆瀝者舊志謂場在蘆瀝浦故名又按邑志其民多刈蘆業牢盆說頗合因並存之

橫浦場圖

西至廣源場界

海月巷

萬蓮墩

南

海

西興園

真鳳

橋胡王

西二園

西二園

橋柳針

十五畝

橋家李

橋家張

橋家沈

村柳


橋墩大

夏家橋

白湮橋

水通界白浙

北





橫浦場圖說

海鹽縣東二里有橫浦至元嘉禾志云北通故邑
西達賁湖南入於海明初置鹽課司隸嘉興分司
而鹽場則在松江府華亭縣之六保相距七十餘
里

國朝順治十三年析華亭置婁縣故場屬於婁東接
金山縣圖經云周康王南游築此城鎮大海又相
傳吳越王錢氏築此爲戍守處南爲捍海塘唐開
元元年建屢遭衝決自我

朝雍正年間改築石塘安瀾底績民永賴焉塘外有
山屹峙海中名小金山楊維禎所謂大金小金出
沒於雲海之中者是也縣名金山以此場署在婁
縣之西昌鎮鹽運嘉松二所分掣而沿途盤驗平
湖縣與金山營汛咸有責焉

浦東場圖

塘護

西至橫浦場界

沐瀝港

開泰廟

浦東場署

北倉汛


北河斷

青龍港
浦東分界

金山縣

鹽池

南





東至清溪鎮
圖說


浦東場圖說

五代乾祐時浦東爲華亭五場之一宋仍其舊乾道八年置搬運倉於張涇堰主運浦東場鹽明置鹽課司

國朝順治十三年析華亭建婁縣故場屬婁雍正三年又析婁置金山縣今場屬金山七年裁并橫浦場乾隆四年復置舊制分司詣場掬掣設署於縣之七保今毀場廨在北倉地方距縣五里南爲護塘外有青龍江吳孫權造青龍戰艦於此昔通滬

瀆入海浩瀚無際宋時爲巨鎮茶場酒務其佳麗
擬於杭州元以後江旣阻隘鎮亦遂廢北爲新運
鹽河內有柘湖又北爲張涇元楊謙隱此有不礙
雲山樓楊維禎撰記其東爲舊運鹽河竈舍在塘
外向分三團今止兩團運鹽皆經新運鹽河沿途
有張堰等汛稽察

袁浦場圖





袁浦場圖說


袁浦一名袁部宋置場解於華亭縣之柘林明置鹽課司嘉靖間築城以備倭患翰林孔目何良俊築別業於此名傲園著有語林又有方廣寺爲唐蔡侍郎功德院寺有觀音廟里人得像海上見夢於僧法元迎歸祀之禱無不應至今祠焉場北爲南橋又北爲黃浦戰國時黃歇鑿其旁支流後與江合遂名黃浦此水視松婁二江爲大故論者卽以爲古東江也運鹽赴掣由南橋出黃浦有各隘

盤驗而葉謝塘一帶闔闐流溢商賈駢坌水陸四達偵緝宜特嚴也

青村場圖

運糧河
西至民河





東至海


青村場圖說

青村鎮在華亭縣一名青林宋設鹽場於此明置鹽課司東爲青村城洪武間安遠侯建永樂中增修萬歷間濬池深一丈六尺闊十丈

國朝康熙二十二年重修雍正三年分華亭爲奉賢縣卽以青村城爲治場亦改隸焉城臨大海左吳淞右柘林青村與南匯川砂居中皆不遠六十里首尾相應爲南直巨防場境陸路南北接袁浦下砂運鹽河有二道自青村鹽倉北流會諸水一西

由岡涇塘出浦一北出閘港出浦海塘三十里塘
內外皆竈舍鹽運嘉松二所分掣

下砂頭場圖



下砂頭場圖說

下砂鎮在上海縣由縣而北勢灑下因名下砂一名雀砂今屬南匯縣宋建炎中設松江分司元遷鹽場於石筍里名新場復移周浦鹽倉於下砂明初下砂仍設分司以橫浦浦東袁浦青村下砂五場鹽課司隸焉正統二年移鹽場於新場鎮如元舊

國朝設大使場署在縣之南二墩東濱海西通鹽鐵塘世傳吳越王爲此以運鹽鐵後宋人開港一十


八所鹽商舟楫往來交通改名下砂浦又西爲周
浦宋詩人儲泳故里也東爲運鹽河場鹽出浦皆
經此又按邑志下砂多巧工精刺繡稱下砂繡云


下砂二三場圖

西至黃浦界

有司地

上海縣有司地





下砂二三場圖說

下砂二三場明正統五年都御史朱與言奏分下砂爲三東北者爲二場二場之北爲三場設大使副使各一領之嘉靖時二三場竈戶逃亡不設煎竈至

國朝康熙四十一年題汰三場大使并入二場雍正二年又裁二場總歸頭場兼理七年復設二場場官一員乾隆五年又復設三場是爲下砂二三場署在南匯縣之川砂堡江南通志云川砂舊名八

團鎮有三場鹽司按之卽今處字本從水以多水
患改作砂賦爲兩浙最南界南匯北過慶寧寺寺
爲宋建炎間造古剎也西有三林莊沈莊塘皆通
黃浦要道又有北蔡市市心有虹橋東爲運鹽河
循海塘北行通諸團運鹽支渠

崇明場圖



第一圖說




崇明場圖說

崇明本通州海濱地唐武德間海中湧出二州謂之東西沙楊吳因置崇明鎮宋天聖三年續漲一沙名姚劉沙嘉定間變爲斥鹵置天賜鹽場崇明之鹽場自此始元至元中升姚劉沙爲崇明縣明成化十八年置天賜溝場并大使副使一員以莞瀆鹽課派撥三分之二煎辦宏治間全沙淪沒隆慶間裁革大使

國朝乾隆四年復設易今名場署在沈安狀堡有大

通富民天仙諸河是爲支河北施翹河乃幹河也
河自長沙逶迤達於袁吳孫三沙三沙有金鳳山
舊名金鼇三沙之北有寶慶寺文天祥有海上瀛
洲遺篆其東北海中有蛇山洋山鶯游山洋山爲
江浙會哨之所場向屬包課並無歲額亦不設團
唯置巡船捕役以緝私爲盡職耳

錢清場圖



錢清場圖說

錢清場宋初置至明以元蕭山縣興善寺運米倉
基改設其名錢清者或云後漢父老持百錢送太
守劉寵各取一大錢納之因以此表其清一云錢
武肅王誅董昌得名解在縣之鳳儀鄉初隸蕭山
後屬山陰

國朝雍正二年以西興場竈舍無幾裁并錢清故場
境益大東西兼有航塢蕭然諸山而湘湖亦在其
南澄泓泛灩中產蓴菜不減江東其地之最古者

爲固陵越絕書云范蠡敦兵城也又有劉寵祠在
錢清鎮會稽郡丞江革祠漕運官張夏廟皆在西
興咸有功德於民者場北自龜山起至西興爲瓜
瀝塘沿塘皆竈舍運鹽赴所多支河小港有營汛
盤詰若由他道卽爲私鹽

三江場圖

南



三江場圖



東江東江場界圖說


三江場圖說

三江場在山陰縣東北宋熙寧改鹽法以錢清分
爲三場一曹娥一三江明設鹽課司於縣治之陡
亶鎮陡亶舊有閘唐貞元間觀察使皇甫政建凡
七門以洩鑑湖之水出三江口入海明郡守湯紹
恩建閘於三江上應斗宿凡二十八洞以時啟閉
而三縣無水患陡亶閘遂廢縣民德之建祠閘上
國朝雍正三年
敕封寧江伯萬歷間閘稍壞知府蕭良幹增石修之改

旁四洞爲常平閘以洩暴漲閘口有三江城明湯
和設城西北隅爲海口西連浙江北通澈浦其地
廣產牢筴乾隆五年始析爲二一名東江一名三
江歲額爲不減云

東江場圖






東江場圖說


東江場在會稽縣乾隆五年由三江場分設宛委諸山在場之西南所稱藏金簡玉字之書者也西有巫山一名梅山相傳越王翳避位於巫山之穴越人薰而出之後葬其上因名縣志漢梅福居此故又名梅山下有子真泉梅山之北有浮山在海口東爲車家浦接曹娥場界北至海塘竈舍向撥四團今存三團鹽由陸家橋出西小港抵所候掣

[illegible]

曹娥場圖



東至金山場界



曹娥場圖說

會稽縣東有曹娥江舊名浦陽以漢孝女曹娥尋父屍自沉於此因更今名江上有埭埭上有孝女廟宋增建娥父曹府君祠旁有娥墓場爲宋熙寧間錢清場分出元明并仍其舊迤東臨江爲鹽課司又東爲百官渡西南有馬目山水經注洪濤一上波隱是山勢淪嵒亭者是也下爲杜浦江左右皆鹽場分東西二扇西扇在會稽東扇在上虞國朝乾隆五年分設金山場以東扇隸新場西扇歸


曹娥運鹽各就近出場赴紹所掣驗

金山場圖

李國由北河運至新所

四條
下河

水城金至南





金山場圖說

場於乾隆四年由曹娥場分出中隔一江凡東扇之百官雁埠諸團皆隸焉設鹽課大使一員專領團事金山者以地有金雞山在下竈之前世傳有金雞二鳴石上石爲迸裂故名解設上虞縣治之百官鎮場北爲夏蓋山舊傳夏禹駐蓋於此下卽夏蓋湖南唐長慶二年引灌永豐上虞寧遠新鄉孝義五鄉田兼有魚鰕芡葦之利俗謂日產黃金方寸自湖而西爲纂風鎮有瀝海所城明設千戶


防守今裁其地濱臨江海各就淋地熬煮運鹽由
外江至會稽四株槌樹下過壩赴掣

石堰場圖

南



北



石堰場圖說

餘姚縣石堰場舊名買納場宋分石堰爲東西場與鳴鶴鼎居鄞越之交後并東場於鳴鶴而西場獨存元建鹽課司於流亭山明仍其舊今場署在縣治之東北二十里場北有大塘名蓮花其下有周潮榆柳利濟五塘周塘爲推官周進隆築進隆因軍民與竈戶爭地築此界之因呼周塘上有臨江衛坐衝大海爲番舶咽喉必由之路民設武弁防守北瀕海爲歷山相傳舜封支庶於餘姚思舜

故取像於此南爲梅梁山山左右有女仇燭溪諸
湖而北堰爲鎮海等邑回潮傾注鹽船守候稽時
因築通明壩分導壅遏以通官民舟楫北堰則專
達鹽運莫不便之場廣產土滴煎辦外餘滴許別
場買濟云

鳴鶴場園

西至石塘埔界

湖洋四

龍公祠

署場鶴鳴

湖頭廟

寺山

寺仙金

房民

城司山三

明海溝

衛海觀

明溝

城司頭向

向頭山

董澤園

新溝

杜家園

塘清利

溝開新

龍池

蔣大聯舍

蔣德先舍

蔣公盛舍

蔣天祿舍

余大就舍

余大有舍

余德和舍

余慶來舍

陳本立舍

余德舍

余德舍


余德舍

余德舍

余德舍

北






鳴鶴場圖說

宋咸平間置場於慈谿縣之鳴鶴鄉後改隸越州元元貞初合鳴鶴東西石堰爲一場明洪武二十五年重置宏治時侍郎彭紹題改折鹽倉場署在寺山之側其名鳴鶴者相傳地有山如鶴飛鳴然或云唐元和時虞九皋字鳴鶴第進士鄉人重之因以名其所居內有松浦古窑浦淹浦洋浦四水而古窑淹浦爲鳴鶴一鄉之關鎖內以蓄杜湖之水外以捍海上之濤鹽丁載漚悉由於此其北爲

觀海衛明設指揮使以三山龍山爲左右翼者也
衛西卽向頭所設烽堠蕩地悉在塘外團舍綦布
運鹽赴所絕曹娥而西無他繞道肩販多在長溪
一帶偵緝宜加謹焉

清泉場園





清泉場圖說

清泉場在鎮海縣崇邱鄉宋崇寧三年置明設鹽課司去縣僅十里縣濱海有招寶金雞二山對峙以爲屏障招寶舊名候濤以諸番入貢停舶改名招寶四向無際琉球日本諸國皆在指顧間原設臺堠明嘉靖間建城後改所外又有虎蹲蛟門二山輿記所謂天設之險是也其東境之水自義成長山二橋歷東江碶南達鄞縣爲運鹽道路場界自遷棄後近惟內港開煎運鹽從鄞縣達餘姚上

虞二邑過曹娥江抵紹所候掣

龍頭場圖




龍頭場圖說

龍頭場在鎮海縣宋開熙元年置明初設鹽課司
天啟間并入清泉

國朝乾隆五年復設場解在九龍山之東而九龍山
左右及施公山下皆有倉俱毀北至海有靈緒塘
又有護塘繞龍山城城卽石塘團舊址明初築龍
山北對金山東對烈港爲臨海咽喉東霍山在東
北海中吳淵穎記所謂東南望東霍山多大樹徐
福蓋駐此是也塘內外皆有團舍運鹽經曹娥江

與清泉鳴鶴同設巡檢司以備巡察



穿長場圖說

穿山長山本二場宋時場在定海者四長山清泉
龍頭穿山穿山本乾道中清泉子場開禧間易今
名明洪武時各設官領之天啟間并長山於穿山
因名穿長場今仍之定海今改鎮海而長山舊署
在羅山者遂廢場東有二所曰穿山明洪武
間皆設屯墩西有五龍汶蛇溝諸水皆海水分入
上各置碶以通鹽運

國朝雍正間鹽大使耿昭需增築永豐塘內以衛墾

灘外以捍潮患而竈舍悉移塘外刮煎誠善政也

大嵩場圖





大嵩場圖說

宋明州置監明洪武三年設場於鄞之大嵩江因名正統二年裁岱山蘆花二場并入大嵩

國朝因之大嵩江之北有港亦名大嵩對峙韭山直衝外海極爲險要明湯和建所於此南有桃花山產茶甚美北有太白山視諸山最高上有龍池歲旱禱雨輒應場三面瀕海恒苦潮患雍正四年鄞縣知縣楊懿請帑開渠建立塘埭得以禦鹽蓄淡民爲立祠黃牛礁在灘外海中爲全場屏蔽近因

鑿石傾陷煎灘有潮水直入之虞運鹽赴所皆經
黃牛礁下

玉泉場圖



海大東

三

洋日大

八

所倉鐵

東大洋

界海大東




玉泉場圖說

玉泉場在象山縣治東南十里因玉泉山得名明設鹽課司

國朝康熙十八年裁并大嵩名嵩玉場乾隆五年復設舊署在玉泉山下後移建縣城縣治四面皆山而象山爲縣主山秀出雲表有白鹿飲泉亭觀瀾亭諸勝稍西爲陶貞白鍊丹山下有盤桓徑多翠篠繞級而登望之人在竹上行東濱海爲鋸門洞相傳爲五龍聚會所至境內之昌國衛及爵溪錢

倉二所皆明設備於海岸者場竈自順治間遷入
內地運鹽北經湖頭渡達鄞縣以赴紹所

長亭場圖





長亭場圖說

長亭場宋時置在寧海縣之港頭有大覺堂爲鹽課司習儀處大觀三年徙長亭去縣治一百三十里明洪武初設鹽課司

國朝順治年間鹽場遷徙止存山竈康熙九年遷復其地爲采恩山山如圍屏左獅子巖右香花山長亭場在其下場西有山名躍龍者上有方正學先生祠其麓卽正學故里又宋樓鑰有送其弟元衡歸長亭場詩卽此地也其鹽由海赴掣故於亭頭

及海口多設防汛營寨以時協緝以絕諸弊

黄巖場圖



黃巖場圖說

宋天聖中設監熙寧五年置於太平縣之南監街
曰迂浦監去黃巖縣六十里元改爲黃巖場監元
貞元年陞鹽司大德三年設團竈明洪武初置百
夫長凡九倉黃巖太平二縣各隸其四惟赤山團
倉屬臨海今場屬於黃而舊址則仍在太平縣之
十都

國朝康熙四十一年建大使署東有松門山晉王羲
之西郡記謂永寧縣海中有松門島嶼上皆生松

卽此下有松門衛衛之西有新河所並明置東北
有海門衛爲台郡咽喉今改衛爲寨康熙間增設
礮臺防守團竈皆在松門山下運鹽經新河所場
枕江襟海舫私易集各隘非嚴設巡邏不可

杜濱場圖





杜瀆場圖說

臨海縣之承恩鄉昔時海水漲成溝澮因以瀆名是曰杜瀆宋熙寧五年鹽場置東洋鑑羅地方今名北澗明設鹽課司

國朝康熙三年題并黃巖場雍正六年改設署在塗下橋場東南有海門山明一統志云相對如闕北有白鶴山上有懸溜遠望如倒挂白鶴因名挂鶴泉右爲椒江府志云南則海門衛北則前所兩城對峙爲台區要隘其水合靈江永寧江同流入海


運鹽則自輕盈浦以入江場本瘠薄鹵味遇雨卽
淡惟在鐫戶之勤於守瀝而已

長林場圖

長林場圖

西平水長林場

二



海至南

洋海

山錦

園

園

清

東至太平洋

署府

學

學

學

學



長林場圖說

樂清縣宋置場元卽名樂清鹽場明設鹽課司於東塔山下今所稱塔頭者是

國朝官仍舊制解署廩舍悉遷置翁洋古塔山寺其縣治之最著者爲雁蕩山本諾矩羅尊者道場有大小龍湫經行晏坐諸勝場西有白石山謝靈運有白石巖下經行田詩其餘白沙芳林大小芙蓉皆鹽丁開坦地萬橋爲萬規所建有記運鹽皆經此迤東爲蒲岐所明洪武年置獨居隘口較方山

婁渙爲尤要今改寨天富北監宋初與南監並置
見食貨志明洪武間隸樂清縣在玉環鄉

國朝設大使後因竈舍遷棄山鄉不能煎燒康熙三
十九年并入長林

雙穗場圖

南至平陽縣界

灰場

信字園

九鳳山

飛雲渡

飛雲渡

大興

國興

倉穀堂

學縣

縣治

署縣

西至春風縣界

三

大興

北平





雙穗場圖說

瑞安縣之五都宋熙寧間置雙穗場元明仍之

國朝設大使場署在今之長橋場東爲篋簾山宋儒
林石隱此西北爲仙巖山上有仙巖寺爲宋陳傅
良讀書處其南爲飛雲江江南北皆鹽丁開坦地
天富南監場先設於平陽縣之東鄉宋乾道時遷
十一都元至正間徙市東河西明洪武八年又徙
蘆浦建立場解宏治四年建倉儲以濟貧竈俱久
圯

國朝康熙二十六年裁并雙穗以兩場地址相接也

永嘉場園

天祥寺

西王雙橋場界

永嘉場園

永嘉場園

梅田廟

引鹽堤

大梅頭汛

白水山

永茂園

永興園

永興園

永興園

永興園

永興園

永興園

新城

永興堡

大寺

一和堂

五甲汛

五甲汛

五甲汛

金明河

山泉

山泉

山泉

山泉

山泉

市前街

廟寺閣

海門

北

南





永嘉場圖說

唐置十監永嘉居一宋改爲場明設大使一員

國朝順治十八年裁大使并入雙穗場雍正七年復設場署在永昌堡城內永昌堡明築爲一方巨鎮東北海濱又有寧村所城亦明設隸盤石衛撥軍分守北爲青山下有瑤溪其水北出海口陡臺上有關聖廟又北爲華蓋山天下第一十八洞天相傳容成子修道於此西爲大羅山一名泉山朱買臣言越王居泉山一夫守險萬夫不得上卽此上

有菊花潭茶山霹靂尖諸勝下爲明張孚敬羅峯
書院場竈在東南一帶自復設以來墾灘漸復歲
額無虧所配引鹽仍運溫處二府屬住賣

杭州批驗所圖






杭州批驗所圖說

鹽引以杜私販而鹽或逾額引或詐冒此批驗所
之由設也元大德三年始立檢校所四杭州嘉興
紹興溫台專驗鹽帑延祐六年罷之至正二年復
各立檢校批驗所兼驗鹽引明初立批驗所四杭
紹嘉溫復增寧波台州二所爲六宏治間廢寧台
二所崇禎十三年增松江批驗所

國朝順治初設杭紹嘉溫四所十三年增松江批驗
所康熙五十年裁溫州批驗額存四所杭所在省

城艮山門內新橋之南卽元時檢校所舊址去運
司五里南至掣廳門東向中爲甬路爲正廳西向
瀕東運河以便掣驗北爲所署巡鹽御史按掣時
鹽船三日前齊入艮山水門泊太平橋掣畢給號
票實帖分泊德勝豬圈二壩候程開運運分二道
浙東者經富桐嚴三關盤驗浙西者經蘇湖二府
盤驗



嘉興批驗所圖說

所在府治之春波門外三里卽宋玉霄萬壽宮故址元嘉祐間置檢校所於鹽倉坊後燬於兵明洪武時以水次便利移建於此萬歷三十五年巡鹽御史方大鎮重建距運司二百里

國朝因之建掣廳北向正中名仰德堂爲架門爲左右廊後爲觀稼樓樓前蒔花疊石架亭鑿池以備公餘燕息旁爲所署掣廳外爲運河場鹽到所俱泊運河橋下巡鹽御史臨掣於大奚家橋吳涇橋

豐橋三處封柵掣畢開柵放行鹽船俱出合歡橋
分貯倉廩候商領程開運經蘇湖二府盤驗

紹興批驗所圖

批驗所
外郎大江
連官陽祠
慶本殿

新橋

陰路

匯船由此河
入橋關候單
連官陽祠

黃山
鎮


龍王廟

張神廟

民地

塘海

北






紹興批驗所圖說


元代批驗所在府治西北六十里明正統間遷山陰縣錢清鎮宏治時又移建蕭山縣之白鷺塘去運司六十五里

國朝因之置掣廳西向臨運鹽河又別建巡鹽御史院署在導山之陽有正廳有大堂有左右司廳有公廨東爲所署掣廳右以橋爲關鹽船由場抵所候掣掣畢放行運至新壩義橋堆貯江岸所官不時巡察又於發鹽處所編立保甲候商領程開運

經富陽等關盤驗

松江批驗所圖





松江批驗所圖說

松江所原名蔣涇埠向行票鹽故前代不設批驗所至明崇禎十三年用御史馮垣登言改票行引始設批驗所於鬪武濱在府城西南二里


國朝順治十三年改下砂場副使爲批驗所大使其地有掣廳南瀕運鹽河東爲雨花庵卽宋買納場故址西爲所署有倉廩若干間商鹽由東汊港進口經米市河進放生橋東柵候掣巡鹽御史掣畢泊二里涇西柵領程開運至嘉慶六年兩浙鹽政


延豐奏請移改東之掣廳爲批驗所西之批驗所
爲掣廳鹽船改從西浦口抵所候掣仍畱西柵責
成所官稽查奉

旨允行郡城西南舊有放生河自建所後改名運鹽河
河西爲二里涇今亦名運鹽河其南卽黃浦江浦
東爲東汊港西爲西浦口皆通二里涇向時運鹽
皆進東汊港抵所涇之西舊有石壩蓄水以濟商
運乾隆六年因商民爭訟將壩拆毀從此東西兩
路進潮水流沙積歲久湮淤而東汊港尤甚商鹽

臨掣皆舟泊港外不能直抵掣所今奏准將二里
涇西口淤淺處開濬卽令商鹽改進西浦口運所
仍於新移掣廳之東築小石壩攔截東流以資農
田灌溉至舟楫往來則有米市河可通云

兩浙鹽院署圖





兩浙鹽院署圖說

唐乾元元年置巡院十二浙江其一也後屢廢屢設五代時罷巡院置轉運使宋設都大發運使以總之明永樂間始差監察院御史開支天下鹽課至正統三年於兩淮兩浙各差巡鹽御史自景泰以後裁兩浙巡鹽嘉靖三十一年復設浙江巡鹽都御史

國朝順治元年差御史巡視鹽課十年停差十二年復差康熙六年議准於六部郎中員外郎及監察



御史內選擇一員差遣八年停差六部官專差御史十一年停差御史歸并巡撫十二年仍差御史雍正二年以副都御史管理兩浙鹽政四年仍歸浙江巡撫乾隆五十八年專設兩浙鹽政兼管織造卽以織造舊署改建院署明時巡鹽御史署在武林驛前爲宋太平興國傳法寺基今在南關廠前正中爲大堂上奉


御書敬慎二字匾額前爲露臺爲甬道爲儀門東西廊爲候官廳爲書吏房後爲穿堂爲勤熙堂爲內宅東

爲書廳後爲長廊爲花廳又東爲庖湑爲廩廩爲
從舍西爲書室爲幕寮爲賓館大門外爲東西轅
爲巡捕廳左右有二坊蓋

簡畀隆則體制宜肅蒞斯職者其敢不精白一心興利
除弊以勉思報稱也與

運司署圖





運司署圖說



唐開元間置江淮都轉運司以中書平章兼領無專職天寶中始置鹽鐵使寶應元年鹽鐵兼轉運貞元間廢江淮轉運使及水陸轉運使後復置榷鹽使宋設諸道轉運使太平興國三年開兩浙路轉運使署於鳳山雙門內分南北兩衙熙寧間移置錢塘之太平坊元改爲兩浙轉運鹽使司明代因之


國朝初稱都轉運鹽使司鹽法道康熙四十九年兼

驛務名鹽驛道雍正四年又兼水利乾隆間裁水利驛務至五十八年改運司專管兩浙鹽課典司經入勾考歲成任綦重矣署瀕湧金河跨河有橋名轉運新橋上建譙樓東向進西爲計臺門南向左爲將盈庫右爲經歷司署中爲甬路爲儀門爲露臺爲大堂東西廊爲六房吏舍大堂後爲經畧堂西爲使宅有宅門內爲絜矩堂爲五間樓西爲花廳爲書室爲水閣爲碑亭又西爲庖湑爲從舍環署有水名環帶河明許穀都轉運使題名記云

本以憂勤操以廉白行以寬裕察以精嚴則聞譽
彌光卽以是言爲官箴可也

宣統元年






寧紹分司署圖說


唐轉運使有副使宋初增判官建炎中更置運鹽使司分司元設同知二員運判二員明置兩浙都轉運使有同知一員副使一員判官二員又設四分司以同知領松江以副使領寧紹兩判官分領嘉興溫台寧紹分司署在紹興府治之火珠山側卽宋錄事司故址元太德間置明因之

國朝康熙二十年裁運判一員并溫台分司於運副而紹興之署亦久廢不居遂建於運司計臺門之

右乾隆五十八年改爲商人辦公之所今分司署
移錢塘縣東之奎垣巷門東向進內爲大堂南向
折而西爲甬道爲二堂爲花廳爲內宅左右皆有
耳房比舊制較軒敞焉

嘉松分司署圖






嘉松分司署圖說


嘉興分司明設署在察院西爲招提寺故址後改
楊公祠宋時華亭有茶鹽分司黃震記謂卽轉運
幹官之在外者又設買納官支鹽官各一員署在
下砂鎮建炎間置明嘉靖間燬於火移建新場鎮
之北久廢

國朝康熙十六年裁松江分司運同四十三年歸嘉
興分司運判接管署在運司二門內之左乾隆四
十三年以將盈庫地窄改入庫內今移建於錢塘

縣治之西壁坊去運司署不及一里外爲大門入
爲班房爲二門爲吏舍爲大堂爲二堂東爲花廳
又東爲書室西爲住房其公廨規制比舊時有加
云

文湖明圖





文瀾閣圖說

高宗純皇帝命儒臣編輯四庫全書建文淵文溯文源文
津四閣藏庋羣籍復念江浙爲人文淵藪宜廣布
以光文治

命再繕三分

賜江南者二浙江者一浙江卽以舊藏圖書集成之藏經
閣改建文瀾閣并仿文淵閣格式藏貯閣在孤山
之陽左爲白隄右爲西泠橋地勢高敞攬西湖全
勝外爲垂花門門內爲大廳廳後爲大池池中一


峯獨聳名仙人峯東爲


御碑亭西爲遊廊中爲文瀾閣閣建三成第一成中藏圖書集成後及兩旁藏經部第二成藏史部第三成藏子集二部皆分度書格凡四庫書三萬五千九百九十冊爲匣六千一百九十一圖書集成五千二十冊爲匣五百七十六總目考證二百二十七冊爲匣四十委員掌之有願讀中祕書者許其借觀傳寫設檔登注勿令遺失污損所以嘉惠藝林者至矣夫前代書籍多藏祕府牙籤錦帙外人莫

得而窺間有頒賜給借已屬僅事如我

朝之以四庫縹緗津逮末學鄉嬛福地徧及東南誠
曠古所未有也猗歟盛哉

崇文書院圖





崇文書院圖說

西湖自南宋時相傳有書院在瑪瑙坡之後岡元至元間廉訪使徐子方卽宋西太乙宮故址移建三賢堂祀唐白居易宋林逋蘇軾因仿書院規制列志仁集義達道明德等齋明布政使甯良改建於成化間有書院贍田名西湖書院正德時楊孟瑛於三賢祠增唐李泌爲四賢祠萬歷間巡鹽御史葉永盛移築葛嶺之南孤山之右顏曰崇文以浙商多籍新安故疏新安諸博士弟子自爲籍以

隸於浙聚書院爲講讀地每於湖舫會文名曰舫
課後人思之卽四賢祠西偏建堂中奉朱子而祀
永盛於其後寢


國朝督學王掞重構講堂名西湖書院延師課士康
熙四十四年


聖祖仁皇帝南巡

賜御書正學闡教四大字鹽驛道張若震鼎新其制仍榜
曰崇文書院疏其泉爲月池中爲饗堂闢其左爲
亭敬摹

御書勒石以奉之後爲敬修堂再後爲諸生齋舍爲守祠
人住居朔望有課有膏火有筆資造士之制備焉
其後巡撫常安按察使徐恕運司阿林保俱重修
之嘉慶五年鹽政延豐復加修葺諸生肄誦其中
者並增餽廩多士彬彬稱盛矣

紫陽書院圖





金匱要略卷之二十一
紫陽書院圖說

紫陽別墅者武林商籍士子會文之地西湖既建
崇文書院前鹺使高熊徵以去城稍遠諸生往返
爲艱遂買宅於鳳山門內割俸經營鹺商等踴躍
捐貲助成其事以其地當紫陽山麓適與新安之
紫陽同名遂以別墅別之中爲樂育堂奉朱子木
主後爲講堂東爲凌虛閣皆諸生誦習之所又折
而東爲春草池上有校經亭又上爲看潮臺尋詩
徑其巔爲文昌閣又有小瞿塘石蕊峯鸚鵡石筆

架峯螺泉葡萄石諸勝寧紹分司徐有緯按察使
徐恕先後修葺當事每延名師主講悉仿白鹿洞
規條嘉慶五年鹽政延豐與崇文同加葺治其螺
泉歲久就湮至是復顯形如旋螺澄清映徹在筆
架峯下咸以爲文明之應○又江南無錫亦有紫
陽書院地在惠山寺河塘之上舊爲浙引商人子
弟讀書處因祠祀朱子故亦以紫陽名其門樓曰
溪山第一有廳事五楹廳前有池今講誦久虛爲
巖商議事公所僅存書院之名是以圖不具列

欽定重修兩浙鹽法志卷二終